

Morning Regional Dogri News Bulletin, 16th August 2024

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

- भारतीय चुनावों आयोग अज्ज इक प्रेस कांफ्रेंस च केन्द्र शासत प्रदेश जम्मू कश्मीर च चुनावों करोआने बारे अपने फैसले दी घोषणा करोग।
- भारतीय अंतरिक्ष अनुसंधान संगठन-इसरो नै हुनै कोला किश मिंटे पैहले एसएसएलवी-डी 3 परा अर्थ आबजर्वेशन सैटेलाइट ईओएस-08 कामयाबी कन्नै गासै च छोड़ेआ।
- कोलकाता च सखेत्रु महिला डाक्टर दी हत्या दे विरोध च आईएमए नै 24 घैंटे दी राष्ट्रव्यापी हड़ताल दा ऐलान कीता ऐ।
- सेना नै डोडा टाकरे च शहीद होए दे कैप्टन दीपक सिंह होरें गी भावें भरोची श्रद्धांजलि दित्ती

<><><><><><>

ECI

भारतीय चुनावों आयोग विधानसभा चुनावों बारे जानकारी सांझा करने लेई इक प्रेस कांफ्रेंस आयोजित करा'रदा ऐ ते एह्दे लेई मीडिया कर्मिणं गी साददा दित्ता गेआ ऐ। एह् प्रेस कांफ्रेंस नमीं दिल्ली च दपैहरी 3 बजे मगरा होग। भारतीय चुनावों आयोग गी मेद ऐ जे केन्द्र शासत प्रदेश जम्मू कश्मीर च विधानसभा चुनावों करोआने बारे जानकारी ते ब्यौरे गी सांझा करोग। इत्थें एह् दस्सना लाजमी ऐ जे गृह मंत्रालय नै भारतीय चुनावों आयोग गी भरोसा दोआया ऐ जे ओह् जम्मू कश्मीर च विधानसभा चुनावों करोआने लेई लोड़चदी सुरक्षा मुहैआ करोआग।

<><><><><><>

ISRO

भारतीय अंतरिक्ष अनुसंधान संगठन-इसरो नै अज्ज अर्थ ओबसर्वेशन सैटेलाइट एसएसएलवी-3 प्रक्षेपित कीता। एह् डोआरी अज्ज बडलै 9 बज्जियै 17 मिंटे उप्पर सतीश धवन अंतरिक्ष केन्द्र श्रीहरिकोटा थमां होई।

इस प्रक्षेपण राएं एसएसएलवी विकास परियोजना दा विकास कम्म पूरा होई गेआ ते भारतीय उद्योग ते एनएसआईएल दे मिशन संचालित होई सकगंन। एह प्रक्षेपण यान 10 थमां 500 किलो दे लौहके, दरम्याने ते भलेआं लौहके उपग्रहें दा प्रक्षेपण करने दी समर्थ रखदा ऐ।

<><><><><><>

IMA-Strike

भारती मैडिकल संघ आईएमए नै कोलकाता च सरकार आस्सेआ चलाए जा'रदे आर.जी.कार मैडिकल कालेज ते अस्पतालै च इक प्रशिक्षु महिला डाक्टर दे कथित तौर पर बलात्कार ते मगरा हत्या दे विरोधै च अज्ज बडलै 6 बजे थमां 24एं घैंटें लेई गैर अपात सेवाएं गी राष्ट्रव्यापी तौर पर बंद रखने दा फैसला कीता ऐ। संघ नै अपने इक ब्यान च आखेआ जे आउट पेशेंट विभाग कम्म नेई करगंन ते ऑपरेशन नेई कीते जांगन। उआं जरूरी सेवां चल दियां रौंहगन ते अपात सेवा वार्डा कम्म करदियां रौंहगन।

<><><><><><>

PM-I Day

प्रधानमंत्री नरेन्द्र मोदी होरें कल 78में स्वतंत्रता दिवस दे मौके पर शहीदें ते स्वतंत्रता सैनानिएं गी श्रद्धांजलि अर्पित कीती। नमीं दिल्ली च लाल किले दी प्राचीर थाहर राष्ट्रीय झंडे गी फ़ैहराने मगरा राष्ट्र गी संबोधत करदे होई उनें भारत दे विकास ताई भविष्य दे लक्ष्यें दी श्रृंखला दी रूपरेखा पर लोह पाई। श्री मोदी होरें गलाया जे बैंकिंग, सैलसफा, एमएसएमई, शिक्षा, सेहत सहूलतां परिवहन ते राई-बाई जनेह् हर क्षेत्र च नमीं ते आधुनिक प्रणाली स्थापत कीती जा'रदी ऐ। उनें गलाया जे खला दे क्षेत्र च स्टार्ट अप च उछाल देसै गी इक ताकतवर राष्ट्र बनाने च महत्वै आली भूमका निभान जा करदा ऐ। प्रधानमंत्री होरें महिलाएं प्रति हिंसा ते अपराधें दे बद्दे मामलें पर चेंता प्रगट कीती। उनें गलाया जे अपराधिएं गी तौले शा तौले संजा थहोनी चाहिदी ऐ। एह्दे शा पैहले मोदी होरें राजघाट जाइयै राष्ट्रपिता महात्मा गांधी होरें गी श्रद्धांजलि भेंट कीती।

<><><><><><>

Manoj Sinha

उपराज्यपाल मनोज सिन्हा होरें श्रीनगर दे बख्शी स्टेडियम च राष्ट्रीय झंडा चाढ़ेआ। इस मौके किट्ठे गी संबोधत करदे होई उपराज्यपाल होरें आखेआ जे पिछले 5एं ब'रें च लोकतंत्र दियां जड़ां मजबूत होइयां न। उनें प्रदेश दे नागरिकें गी अपील कीती जे ओह् लोकतंत्र दे विचारें गी अंतर आत्मा दा महत्वपूर्ण हिस्सा बनान।

उनें आखेआ जे जम्मू कश्मीर शांति, प्रगति ते खुशहाली दी बत्ता पर अज्ज आत्म-विश्वास कन्ने अग्गे बघा'रदा ऐ। उनें आखेआ जे असें सब्बनें गी जम्मू कश्मीर गी उपलब्धिएं दा पर्यावाची बनाना लोड्चदा। उपराज्यपाल होरें राष्ट्रीय गान गाने आली प्रतियोगिता दे जेत्तु एं गी नकद इनाम बी बंडे। उनें मार्च पास्ट ते सांस्कृतिक कार्यक्रमें च बेह्तरनीन प्रदर्शन करने आले दस्तें ते समूहें गी सम्मानत बी कीता। मगरा उपराज्यपाल होरें ऐट होम दी मेजबानी कीती। इस मौके पर उपराज्यपाल होरें शहीदे दे परोआर आले, स्वतंत्रता सैनानिएं, साबका फौजिएं, मन्ने परमन्ने दे लोकें ते शैहरेदारें कन्ने गल्लबात कीती ते सब्बने गी स्वतंत्रता दिवस दियां शुभकामना दित्तियां।

<><><><><><><><>

CJI-Bangladesh

भारत ते मुख्ख न्यायधीश डी.वाई.चन्द्रचूड होरें बंग्लादेश च मजूदा स्थिति दा हवाला दिंदे होई आजादी दे महत्व ते औंदी राखी हिफाजत च जजे ते वकीले आस्सेआ नभाई गेदी महत्वै आली भूमका गी उजागर कीता। राष्ट्री राजधानी च कल 78में स्वतंत्रता दिवस दे मौके पर सुप्रीम कोर्ट बार एसोसिएशन आस्सेआ आयोजित कीते गेदे इक समारोह च बोलदे होई श्री चन्द्रचूड होरें आखेआ जे आजादी गी हल्के च लैना सोक्खा ऐ पर असेंगी लोड्चदा ऐ जे अस बीते कल दिएं कहानिएं पर ध्यान देचे तां जे असेंगी चेता रवै जे आजादी किन्नी कीमती ऐ। उनें आखेआ जे देशभक्त वकीले दा कम्म भारत गी आजादी थोने कन्ने मुकम्मल नेई होई गेआ, ओह स्वतंत्रता थोने मगरा बी साढे देसै च अच्छाई दा लगातार जरिया बने दा रेह न। आम लोकें दे हक-हकूके ते उंदे मान सम्मान गी बनाए रखने आस्तै अदालतां महत्वै आली थाहर रखदियां न।

<><><><><><><><>

Wreath Laying Ceremony

भारतीय सेना च कैप्टन दीपक सिंह जेहडे बुधवारें आतंकवादिएं कन्ने लग्गे दे टाकरे च शहीद होई गे हे, उनेंगी श्रद्धांजलि भेंट करने लेई कल इक कार्यक्रम दा सरिस्ता कीता गेआ। श्रद्धांजलि कार्यक्रम दरान व्हाईट नाईट कोर दे जीओसी लैफ्टिनेंट जनरल नवीन सचदेवा होरें शहीद कैप्टन दीपक सिंह होरें गी श्रद्धांजलि भेंट कीती, जिनें मुख्ख दी रक्षा लेई अपना स्वोच्चय बलिदान दित्ता। जम्मू दे डिवीजनल कमीशनर रमेश कुमार ते एडीजीपी आनंद जैन होरें शहीद गी श्रद्धा सुमन अर्पित कीते।

<><><><><><><><>

IPS Nalin Prabhat

आईपीएस अधिकारी नलिन प्रभात होरें गी जम्मू कश्मीर पुलस दे विशेष डीजी दे तौर पर नियुक्त कीता गेआ ऐ। ओह 30 सितम्बर गी पेंशनरी होआ'रदे आर.आर.स्वैन हुंदी थाहर लैंगन। इस सरबंधै च गृह मंत्रालय आस्सेआ इक हुक्म जारी कीता गेआ ऐ। प्रभात होरें गी त्रै बारी पुलस बहादुरी पुरस्कार कन्नै नवाजेआ जाई चुके दा ऐ। ओह आंध्रप्रदेश च नकसल विरोधी पुलस बल दे बी अध्यक्ष रेई चुके दे न। प्रभात होर सीआरपीएफ च बी अपनियां सेवां देई चुके दे न।

<><><><><><><>

Missile Scientist

मन्ने परमन्ने दे मिसाईल सांईसदान डॉ. राम नारायण अग्रवाल हुंदा कल काल होई गेआ। रक्षा अनुसंधान ते विकास संगठन नै डॉ. अग्रवाल हुंदी मृत्यु पर बसोस प्रगट करदे होई उनेंगी उत्कृष्ट एरोस्पेस सांईसदान दस्सेआ। पद्मश्री ते पद्मभूषण कन्नै सम्मानत डॉ. अग्रवाल हुंदा भारत दी लम्मी दूरी तगर मार करने आले मिसाईलें अग्नि दे विकास च अहम योगदान रेहदा ऐ। अपनी इक सोशल मीडिया पोस्ट च डीआरडीओ नै दस्सेआ जे डॉ. अग्रवाल होरें दऊं दहाकें तगर मुल्ख दे महत्वै आले अग्नि मिसाईल प्रोग्राम दी अगुवाई कीती दी ऐ।

<><><><><><><>

Atal-Death Anniversary

देश अज्ज साबका प्रधानमंत्री ते भारत रत्न अटल बिहारी वाजपेयी हुंदा पुण्यतिथि उप्पर उनेंगी भाव भरोची श्रद्धांजलि अर्पित करा'रदा ऐ। अज्ज नमीं दिल्ली च अटल बिहारी वाजपेयी हुंदी समाधि सदैव अटल उप्पर इक प्रार्थना सभा दा बी आयोजन कीता गेदा ऐ। अटल बिहारी वाजपेयी त्रै बारी प्रधानमंत्री, दऊं बारी राज्यसभा मिंबर ते 10 बारी लोकसभा सदस्य रेह हे।

<><><><><><><>

Udhampur Plantation

ग्रामीण विकास मैहकमा उधमपुर आस्सेआ जंगलात मैहकमे ते म्यूनिसिपल कौंसल उधमपुर दे सैहयोग कन्नै स्वच्छता पखवाड़ा अभियान दे हिस्से दे तौरा पर सूई सिंबल इलाके च मनरेगा तैहत बूहटे लाने आली मुहिम दा सरिस्ता कीता गेआ।

इस मौके उधमपुर दियां डिप्टी कमीशर सलोनी राय होरें पर्यावरण संरक्षण दी महत्ता पर जोर पाया। उनें गलाया जे नेही मुहिम कन्ने खित्ते च लगातार ते टिकाऊ विकास ते पर्यावरण दी सांभ संभाल गी होर बढ़ावा थ्होग। एहदा मकसद पर्यावरण दी हिफाजत आस्तै इक ग्रीन कवर तैआर करना ते इलाके च पर्यावरण स्हाबै संतूलन कायम करना ऐ।

<><><><><><>

Amrit Udyan-Opening

अमृत उद्यान अज्जै थमां आम लोकें लेई खोली दितता जाग, जेहड़ा अगले म्हीने दी 15 तरीक तगर खुल्ला रौहग। राष्ट्रपति द्रौपदी मुर्मू होरें राष्ट्रपति भवन च बुधवारें गी अमृत उद्यान गर्मिएं आले संस्करण 2024 दा उदघाटन कीतां इस ब'रे पैहली बारी 29 अगस्त गी राष्ट्री खेड्ड दिवस दे मौके पर खडारिएं गी अमृत उद्यान दी सैर करने दा साददा दित्ता गेआ ऐ। एहदे अलावा स्कूलें ते यूनिवर्सिटिएं दे शिक्षकें गी बी फुल्लें गी दिक्खने लेई सददेआ गेआ ऐ। इस बारी लोकें गी बाग च बोनसाई गार्डन, रोज गार्डन ते सेंद्रल लान च टकोहदे किस्में दे फुल्ल दिक्खन गी लबगंन ते बच्चें लेई ट्री हाउस, बाल वाटिका ते शिक्षण कक्ष जनेह् नेकां बवस्था आकर्षन दा केन्द्र होंगन।

<><><><><><>